



REPUBLIKA E SHQIPËRISË  
KOMISIONERI PËR MBIKËQYRJEN E SHËRBIMIT CIVIL

Nr. 1080 Prot.

Tiranë, më 31.05.2019

**V E N D I M**  
**Nr.61 dt. 31.05.2019**

*“Mbi paralajmërimin e institucionit Bashkia Tiranë, për marrjen e masave të menjëhershme për ndërprerjen e marrëdhënies në shërbimin civil, për nëpunësit që kanë mbushur moshën e pensionit të plotë të pleqërisë”*

Në mbështetje të kompetencave ligjore të parashikuara në pikën 1, të nenit 11, nenet 14 dhe 15, të ligjit nr. 152/2013, “Për nëpunësin civil”, i ndryshuar, të ligjit nr. 44/2015, “Kodi i Procedurave Administrative i Republikës së Shqipërisë”, si dhe Rregullores “Mbi procedurat e mbikëqyrjes/inspektimit”, miratuar me Vendimin nr. 17, datë 11.03.2015, të Komisionerit për Mbikëqyrjen e Shërbimit Civil, në përfundim të hetimit administrativ mbi gjendjen e marrëdhënieve në shërbimin civil, të nëpunësve që kanë plotësuar moshën e pensionit të plotë të pleqërisë,

**VËREJ SE:**

Komisioneri për Mbikëqyrjen e Shërbimit Civil, në zbatim të nenit 65, germa “c”, të ligjit nr.152/2013, “Për nëpunësin civil”, i ndryshuar, dispozitë e cila urdhëron përfundimin e marrëdhënies në shërbimin civil për ata nëpunës të cilët kanë plotësuar moshën për pensionin e plotë të pleqërisë, si dhe tëdetyrave të lëna në Rezolutën e Kuvendit të Republikës së Shqipërisë “Për vlerësimin e veprimtarisë së Komisionerit për Mbikëqyrjen e Shërbimit Civil për vitin 2018”, ku shprehimisht është kërkuar: “Të shqyrtohen me prioritet rastet e individëve, pjesë e shërbimit civil në administratën qendrore dhe vendore, të cilët vazhdojnë marrëdhëniet e punës, megjithëse kanë arritur moshën e pensionit dhe duhet të kishin ndërprerë në kohë marrëdhëniet juridike dhe financiare”, ka realizuar procesin e verifikimit lidhur me zbatimin e ligjit në këtë rast, në të gjitha institucionet që punësojnë nëpunës civilë.

Për të kryer këtë detyrë, ndërmjet të tjerave, është kërkuar nga njësitë përgjegjëse në institucionet e përfshira në këtë proces, që të raportojnë në lidhje me ata nëpunës, të cilët megjithëse kanë plotësuar moshën e pensionit të pleqërisë, ende vazhdojnë marrëdhënien e punës në pozicione të shërbimit civil.

Në këtë proces është përfshirë edhe institucioni i Bashkisë Tiranë, i cili pas kërkesës së Komisionerit për informacion, nëpërmjet shkresës nr. 7968/1 dt. 27.02.2019, ka raportuar se, megjithëse kanë kohë që kanë plotësuar moshën e pensionit të pleqërisë, vazhdojnë ende të jenë në marrëdhënie me shërbimin civil nëpunësit:

- \*\*\*\*\* (datëlindja 05.08.1952) - në pozicionin e punës “*Specialist në Sektorin e Sigurisë dhe Sinjalistikës Rrugore*”;
- \*\*\*\*\* (datëlindja 13.08.1953) - në pozicionin e punës “*Përgjegjës në Sektorin e të Ardhurave Vendore*”;
- \*\*\*\*\* (datëlindja 04.01.1958) - në pozicionin e punës “*Specialist në Sektorin e Zbatimit të Buxhetit*”.

Gjithashtu, nga Komisioneri institucionit i është kërkuar të raportojë dhe për nëpunësit të cilët plotësojnë moshën e pensionit deri në datën 30.06.2019, dhe rezulton se, në Bashkinë Tiranë, deri në datën 25.03.2019, kanë plotësuar moshën e pensionit, nëpunësit:

- \*\*\*\*\* (datëlindja 26.02.1954) - në pozicionin e punës “*Specialist në Zyrën e Informimit Qytetar*”, Njësia Administrative Dajt;
- \*\*\*\*\* (datëlindja 03.05.1958) - në pozicionin e punës “*Specialist Finance*” Njësia Administrative nr. 5;
- \*\*\*\*\* (datëlindja 06.03.1954) - në pozicionin e punës “*Përgjegjës ZAMT*”, Njësia Administrative Vaqarr;
- \*\*\*\*\* (datëlindja 25.03.1954) - në pozicionin e punës “*Specialist Finance*” Njësia Administrative nr. 5.

Në lidhje me këtë aspekt të administrimit të shërbimit civil, në përmbajtjen e nenit 65, të ligjit nr. 152/2013 “*Për nëpunësin civil*” i ndryshuar, evidentohen në mënyrë të shprehur rastet e përfundimit të marrëdhënies nëshërbimin civil për shkak të ligjit, si edhe afati dhe organi që konstaton rrethanat, si më poshtë:

“1. Marrëdhënia në shërbimin civil përfundon për shkak të ligjit kur:

- a) nëpunësi vdes apo kur merr formë të prerë vendimi për deklarimin e vdekjes së tij;
- b) nëpunësi humbet shtetësinë shqiptare apo merr formë të prerë vendimi i gjykatës për kufizimin apo heqjen e zotësisë për të vepruar;
- c) plotësohet moshja për pensionin e plotë të pleqërisë;
- ç) konstatohet pavlefshmëria e aktit të emërimit;
- d) dënohet me vendim të formës së prerë për kryerjen e një vepre penale.

2. Përfundimi i marrëdhënies në shërbimin civil, për shkak të ligjit, konstatohet 5 ditë nga ndodhja apo njohja e tij nga:

- a) njësia e burimeve njerëzore të institucionit, ku nëpunësi ushtron detyrën;
- b) DAP-i për anëtarët e TND-së.”

Në këto kushte, plotësimi i moshës për pensionin e plotë të pleqërisë, në rrethanat e çështjes që po shqyrtohet, është një prej rasteve që parashikohet në pikën 1/c, të kësaj dispozite dhe për këtë arsye, njësia e burimeve njerëzore të institucionit, ku nëpunësi ushtron aktualisht detyrën, sipas pikës 2/a, të nenit të cituar më sipër, duhet të veprojë menjëherë duke e

konstatuar këtëfakt, në një afat që në ligj është parashikuar 5 ditë nga ndodhja apo njohja e tij, si dhe duke injoftuar ndërprerjen e marrëdhënies në shërbimin civil, nëpunësve civilë \*\*\*\*\* , \*\*\*\*\* , \*\*\*\*\* , \*\*\*\*\* , \*\*\*\*\* , \*\*\*\*\* dhe \*\*\*\*\*.

Pozicionet e punës të cilat do të mbeten të lirë pas këtij veprimi, duhet të shpallen vakante, për tu plotësuar, sipas procedurës dhe kërkesave të neneve 21, 22, 23 etj., të ligjit në fjalë.

Për të gjitha sa analizuam më sipër, bazuar në nenin 15, të ligjit nr.152/2013 “Për nëpunësin civil” i ndryshuar dhe pikës 9, të nenit 16 të rregullores “Mbi procedurat e mbikëqyrjes/inspektimit”, miratuar me Vendimin nr. 17, datë 11.03.2015,

## V E N D O S A:

1. Të kërkoj nga Njësia Përgjegjëse e Bashkisë Tiranë, marrjen e masave të menjëhershme për rivendosjen e gjendjes së ligjshmërisë, duke përfunduar marrëdhënien në shërbimin civil për shkak të ligjit, për punonjësit e mëposhtëm:
  - \*\*\*\*\* - në pozicionin e punës “Specialist në Sektorin e Sigurisë dhe Sinjalistikës Rrugore”;
  - \*\*\*\*\* - në pozicionin e punës “Përgjegjës në Sektorin e të Ardhurave Vendore”;
  - \*\*\*\*\* - në pozicionin e punës “Specialist në Sektorin e Zbatimit të Buxhetit”;
  - \*\*\*\*\* (datëlindja 26.02.1954) - në pozicionin e punës “Specialist në Zyrën e Informimit Qytetar”, Njësia Administrative Dajt;
  - \*\*\*\*\* (datëlindja 03.05.1958) - në pozicionin e punës “Specialist Finance” Njesia Administrative nr. 5;
  - \*\*\*\*\* (datëlindja 06.03.1954) - në pozicionin e punës “Përgjegjës ZAMT”, Njësia Administrative Vaqarr;
  - \*\*\*\*\* (datëlindja 25.03.1954) - në pozicionin e punës “Specialist Finance” Njesia Administrative nr. 5.
2. Pozicionet respektive të punës, të shpallen menjëherë pozicione të lira dhe të fillojnë procedurat për plotësimin e tyre sipas kërkesave të legjislacionit të shërbimit civil.
3. Kryerja e veprimeve të mësipërme, duhet të bëhet brenda 7 ditëve nga marrja dijeni për këtë vendim.
4. Me kalimin e këtij afati, njësia përgjegjëse është e detyruar të njoftojë me shkrim Komisionerin për Mbikëqyrjen e Shërbimit Civil, në lidhje me zbatimin e këtij vendimi, si dhe të dërgojë aktet administrative të cilat vërtetojnë realizimin e detyrave.
5. Në rast të mos respektimit të këtij vendimi, përgjegjësia do të jetë personale e subjekteve, që nuk kanë kryer detyrimet e lëna në këtë vendim dhe në zbatim të përcaktimeve të pikës 2, të nenit 15, të ligjit nr. 152/2013, “Për nëpunësin civil”, të ndryshuar, Komisioneri do të vijojë procesin për rregullimin e shkeljeve të konstatuara, duke përdorur mjetet ligjore

për të rikthyer ligjshmërinë në administrimin e shërbimit civil, nëpërmjet gjobitjes së nëpunësit përgjegjës për moszbatimin e masave të përcaktuara në dispozitivin e vendimit.

6. Të njoftohet për këtë vendim Kryetari i Bashkisë Tiranë dhe Njësia e Menaxhimit të Burimeve Njerëzore pranë këtij institucioni.

Ky vendim hyn në fuqi menjëherë.

**KOMISIONERI**

**Pranvera Strakosha**